

Канона праздника два:

Песнь 1.

Ирмос: Отверзу уста моя,/ и наполнятся Духа,/ и слово отрыгну Царице Матери,/ и явлюся светло торжествуя,// и воспою радуясь Тоя вхождéние.

Катавасия оба лика вкупе: Христос рождается, славите. Христос с небес, срящите. Христос на земли, возноситесь. Пойте Господеви вся земля, и веселием воспойте людие, яко прославися.

Песнь 3.

Ирмос: Твоя песнословцы Богородице, живый и независтный источник, лик себе совокупльшия духовно утверди, в честнем вхождении Твоем венцев славы сподоби.

Катавасия: Прежде век от Отца рожденному нетленно Сыну, и в последняя от Девы воплощенному безсеменно Христу Богу возопиим: вознесый рог наш, Свят еси Господи.

Песнь 4.

Ирмос: Незследный Божий совет, еже от Девы воплощения, Тебе Вышняго, пророк Аввакум усмотря зовяше: слава силе Твоей, Господи.

Катавасия: Жезл из корене Иессеова, и цвет от него, Христе, от Девы прозябл еси, из горы хвальный, приосененная чащи, пришел еси воплощься от Неискусомужныя Невещественный Боже: слава силе Твоей, Господи.

Песнь 5.

Ирмос: Ужасошася всяческая в честнем вхождении Твоем: Ты бо, Неискусобрачная Дево, внутрь вошла еси в храм Божий, якоже честнейший храм, всем воспевающим Тя мир подавающая.

Катавасия: Бог сый мира, Отец щедрот, великаго совета Твоего Ангела, мир подавающая, послал еси нам: тем богоразумия к свету

наставльшеся, от ноци утренююще, славословим Тя, Человеколюбче.

Песнь 6.

Ирмос: Божественное сие и всечестное совершающе празднество, богомудрии, Богоматере, приидите, руками восплещим, от Нея рождшагося Бога славим.

Катавасия: Из утробы Иону младенца изблева морской зверь, якова прият: в Деву же всельшееся Слово, и плоть приемшее, пройде сохранъшее нетленну, егоже бо не пострада истления, Рождшую сохрани неврежденну.

Кондак, глас 4: Подобен: Вознесыйся:

Пречистый Храм Спасов,/ многоцѣнный Чертог и Дѣва,/ священное сокровище славы Божия,/ днесь ввѣдится в дом Господень, благодать совводящи,/ яже в Дусе Божественном,/ Юже воспевают ангели Божии:// Сия есть селение небѣсное.

Песнь 7.

Ирмос: Не послужиша твари Богомудрии паче Создавшаго, но огненное прещение мужески поправше, радовахуся поюще: препетый отец Господь и Бог благословен еси.

Катавасия: Отроцы благочестию совоспитани, злочестиваго веления небрегше, огненнаго прещения не убояшася, но посреди пламене стояще пояху: отец Боже благословен еси.

Песнь 8.

Ирмос: Слыши, Отроковице Дево Чистая, да речет убо Гавриил совет Вышняго древний истинный: буди к приятию готова Божию, Тобою бо Невместимый с человеки поживе. Тем и радуяся вопию: благословите вся дела Господня Господа.

Хвалим, благословим, покланяемся Господеви, поюще и превозносяще во вся веки.

Катавасия: Чуда преестественнаго, росодательная изобрази пещь образ, не бо яже прият палит юныя, яко ниже огонь Божества Девы, в Нюже вниде утробу. Тем воспевающе воспоем: да благословит тварь вся Господа, и превозносит во вся веки.

На 9-й песни, Честнейшую не поем, но поем припевы праздника:

1. Ангели вхождение Пречистыя зряще удивишася: како Дева вниде во святая святых.

И посем ирмос: Яко одушевленному Божию кивоту:

Таже второй лик поет тойже припев праздника, и ирмос.

И на кийждо тропарь поют припевы праздника, на оба лика.

Песнь 9. Ирмос:

Яко одушевленному Божию кивоту,/ да никакоже коснется рука скверных./ Устне же верных Богородице немолчно,/ глас ангела воспевающе с радостию да вопиют:// истинно вышши всех еси, Деве Чистая. [Дважды.]

2. Ангели вхождение Всечистыя зряще удивишася:/ како со славою вниде во святая святых.

3. Ангели вхождение Девы зряще удивишася:/ како преславно вниде во святая святых.

4. Ангели и человецы Девы вхождение почтим:/ яко со славою вниде во святая святых.

5. Ангели вхождение Девы зряще удивишася:/ како Богоугodne вниде во святая святых.

6. Ангели взыграйте со святыми, девы сликовствуите:/ Богоотроковица бо вниде во святая святых.

7. Ангели и челове́цы Деву песньми да возвели́чим:/ Боголе́пно бо вниде во свята́я святы́х.

Таже 1-й лик поет втораго канона припев праздника:

8. Велича́й, душе моя, приведенную во храм Господень, и благословенную рука́ми иере́овыми.

И посем ирмос: Светоносный облак:

И второй лик поет тойже припев праздника, и ирмос, и на тропарех поем тойже припев праздника.

Песнь 9. Ин ирмос:

Светоносный облак, вонже всех Владыка, яко дождь с небесе на руно сниде, и воплотися нас ради, быв Человек Безначальный, величаем вси яко Матерь Бога нашего Чистую. [Дважды.]

9. Припев: Величай, душе моя,/ приведённую во храм Господень, и благословенную руками иереевыми.

Троичен:

10. Припев: Величай, душе моя,/ Триипоста́снаго и Нераздельнаго Божества держа́ву.

Богородичен:

11. Величай, душе моя,/ честнейшую и славнейшую горних воинств, Деву Пречистую Богородицу.

Таже оба лика вкупе сошедшеся, поют припев 1-го канона:

12. Ангели вхождение Пречистыя зряще удивишася: како Дева вниде во святая святых.

И посем: Ирмос:

Таинство странное вижу/ и преславное: небо, вертеп: престол херувимский, Деву: ясли, вместилище, в нихже возлеже Невместимый Христос Бог, Егоже воспевающе величаем.